

Read@Uni: Wujudkan budaya membaca untuk generasi akan datang



DR AINI (depan) menurunkan tandatangan sebagai simbolik perasmian Read@Uni UPM 2019.



Dr Aini (tengah) merakam kenangan bersama-sama tetamu jemputan.

SERDANG - Mahasiswa alaf baru seharusnya lebih aktif dan progresif dalam aspek pembudayaan membaca.

Naib Canselor Universiti Putra Malaysia (UPM), Prof Datuk Dr Aini Ideris berkata, sebagai kelompok yang hidup dalam kitaran maklumat dan intelektual, mahasiswa perlu mewujudkan satu budaya ilmu yang terpinpin dan menjadi ikutan generasi seterusnya.

Katanya, trend membaca dalam kalangan mahasiswa lebih fokus dan menjurus kepada bidang pengajian

yang diikuti.

"Seleksi bahan-bahan bacaan pula lazimnya terhad kepada lingkungan bidang pengajian tersebut. Menjadi satu kerugian bagi mereka yang membaca sekadar untuk peperiksaan sahaja sedangkan hakikatnya ilmu itu adalah luas dan perlu diterokai untuk mempertingkatkan pengetahuan dan jati diri.

"Membaca daripada pelbagai sumber maklumat yang mencakupi pelbagai bidang merupakan kunci kepada penemuan ilmu baharu yang

boleh membantu golongan mahasiswa menjadi proaktif dan berdaya saing bagi mendepani segala bentuk cabaran yang mendatang," katanya.

Beliau berkata demikian ketika ucapan perasmian Majlis Pelancaran Read@Uni UPM 2019 di Auditorium Jurutera Radin Umar, Fakulti Kejuruteraan UPM, di sini.

Hadir sama, Ketua Pengarah Perpustakaan Negara, Datuk Nafisah Ahmad, Ketua Pustakawan Perpustakaan Sultan Abdul Samad, Muzaffar Shah Kassim.

Dr Aini berkata, sebagai warga universiti seharusnya menjadi agen penggerak kepada kempen membaca ini supaya sikap membudayakan ilmu dapat diterapkan bukan sahaja kepada warga kampus, tetapi kepada masyarakat luar.

"Kita perlu terlibat secara aktif dalam setiap program dan aktiviti yang telah dirangka agar hasrat dan matlamat kerajaan untuk menjadikan Malaysia sebagai negara membaca menjelang 2030 dapat direalisasikan," katanya.